

*Cromarty.* rum Collegio opulento, dum res stetit ecclesiastica, floruit, in qua Episcopo Rossensi Cathedralis est constituta. Iuxta locatur *Cromerty*, ubi *Virghuare* vir nobilis jure avito hujus Præfecturæ Vicecomes jus dicit, statioque est cuilibet classi quantumvis magnæ adeo comoda & secunda, ut nautis & Geographis *Portus Salutis* nominetur.

*Linus altum.* *ADDIT.* Supra *Littus* est *Altum* cujus meminit Ptolemæus, nunc ut videtur *Tarbarth*, [pertinet ad Dominum Ioannem Makinny, consanguineum Comitris de Seafort.] Ibi enim littus alte eminet, hinc *Cromero* portu illo tutissimo, inde *Celno* flu. *Celno*, nunc *Killian* fl. inclusum. Hæc ad Oceanum Orientalem. In Occiduum mare, *Longus* flu. à Ptolemæo memoratus, qui hodie *Lough Longas*, influit. Deinde *Cerones*, ubi nunc *Ashshire*, regio plurimis æstuariis intercisâ, confederunt.

*Rossie Comitris.* *Rossie* Comitum seriem è Scriptoribus contexere plusquam difficile est. Ante annos plus minus quadringentos Ferquhardum hoc titulo floruisse legitur, deficientibus autem masculis ad *Walterum Lesley*, qui rebus animose sub Ludovico Imperatore gestis nomen *Generosi Equitis* promeruit, per filiam devenit, è qua Alexandrum Comitem Rossensem, & filiam Donaldum, *Insularum Hebridarum* Domino, enuptam genuit. Alexandro nata erat unica filia, quæ in Robertum Albanicæ Ducem jus suum omne transcripsit: quo irritatus Donaldus ille Insulanus, regnante Iacobo III, se Regem *Insularum*, & Rossicæ Comitem dixit, longe lateque ferro & flamma in patriam grassatus. Demum Rex Iacobus Tertius Parlamentaria auctoritate anno M cccc lxxvi Rossicæ Comitatum Coronæ ita adnexuit, ut successoribus

nec ipsum Comitatum, nec aliquam ejusdem particulam ullo modo à *Corona* abalienare, vel cuicumque nisi Regum secundo-genitis è legitimo connubio concedere ullo modo liceat. Vnde hodie Carolus, Regis filius secundo-genitus, Dux Eboraci; eodem utitur, & fruitur. [Hic est ille Carolus, nuper Magnæ Britannicæ Rex, cui anno M DC XLIX Londini caput securi amputatum est.] *ADDIT.*

## EDIR-DA-CHEVLIS NOVA DESCRIPTIO.

**S**I vocem regiunculæ è prisca lingua interpretaris, significat inter duo freta, sic enim revera positus ejus est; ab ortu enim æstivo à Dureinsh ad sinum Cheuliscung in occasum hibernum porrigitur: ubi vicinam regiunculam Assynt habet. Tota sylvis montibus avilis horrida, culturæ nisi paucissimis locis impatiens: mare ac vicina omnia piscosum, sinus halecibus fecundi, montes venatui & aucupis aptissimi, ad exiguum lacum Stacky tractus est sylvestris, ubi cervi omnes bifurcatis caudis reperiuntur. In Isthmo ad promontorium Faro-head cervorum gregibus eo compulsis hominumque multorum indagine & mari clausis, immixtis canibus jucunda est & felix venatio. Incolæ rari, cum aspreta & avia hæc paucis vix sufficiant, attamen pecori apta, equorum, bovm, caprorum gregibus plena omnia, unde neque pisces, caro, aut lacticia defunt. Superioribus temporibus Sutherlandiam dominum agnoscebat, nunc vero Strath-navernicæ accensetur, ejusque domini ditioni subest.

